

武林遊記



登录号 线 11937

函 2 册

卷
林
游
記

人	天	宗
對	張	香
知	餘	十
署	林	氏

武林遊記

明 高攀龍 著

武林遊記

庚寅八月余以事遊嘉湖間而武林在杖屨中矣幼時聞長者談其湖山之勝至此遂擬遊焉以朔日行同行者楊君益卿俞君汝定也先是約同年華德元與偕謁座師沈晴峰德元行後維舟蘇之閶門俟之德元至聯舟行五日抵平湖是時天久旱農困已極晚而小雨秋颯颯然六日謁晴峰公公言其郡守黃仰齋令人嚮往黃公爲守者二而謫者二矣今復守

武林遊記

一

嘉自奉惟蔬腐日早起坐堂皇門無守者卽窮鄉下邑婦女豎穉皆得自達胥隸無敢呵沮監司兩院檄至卽織悉事不可意輒封之還監司使者嚴憚公不啻如其屬士大夫登公堂亦凜凜無敢爲居間者余爲跂仰久之七日已擬回棹而適聞平湖去海僅數里而遙蓋余未嘗觀海德元亦然遂偕往且欲觀晝潮舟抵乍浦不暇呼舁人疾趨而前過乍浦堡至海濱可三里未見海數百武已聞濤聲若風撼萬樹須臾蒼茫接天紺赤無際歷歷遠山在天水縹渺之間疑爲浮雲徐觀之皆山也潮至亦無他奇但漸盈坎

而來初海塘去海可半里潮至則直逼塘觀益曠洪
濤撼足矣徘徊良久心目曠然晚復抵平湖別德元
余竟至嘉興在煙雨樓樓前臨湖下復有石臺顏曰
釣鼇磯觀湖更曠湖中足菱芡右環居民星列左環
綠樹參差亦見小致九日次崇德天復雨杞人之憂
稍解十日次塘棲雨更甚作詩志喜十一抵杭飯畢
冒雨至昭慶寺止焉得一僧號惠谷者吾邑人也頗
慧余急欲顏色西湖日將晡雨小止急索屐至湖濱
徐步蘇隄隄爲中貴孫隆新葺舊隄所植惟桃柳孫
復禩植諸卉甚整隄界于內外湖中兩湖之勝俱掇

武林遊記

二

之矣是時雨絲陰濛水煙籠樹遠山層疊濃淡相間
內湖荷香襲人遊人歌吹與點點魚舟錯落左右瞻
眺恍然自失旦日買舟遊外湖自寺前解維放于中
流表裏青山參差綠樹朱碧樓臺掩映秋水所到可
入圖畫午漏抵淨慈殿宇殊宏敞雨復作絲卒卒而
返至龍王廟卽三賢祠也唐白香山宋蘇學士林處
士主在焉堂顏曰會景又曰漾碧軒前築露臺三面
繞山臺下植荷水煙山翠在楹闌之間已至湖心亭
四面可憑眺少憩至望湖亭繇亭而前卽中貴所築
新隄矣乃舍舟徐步隄上暝而抵寺旦日遊內湖解

維卽至大佛寺已至放鶴亭林處士墓也低回墓側
思不得如處士長主湖山誦詩讀書俯仰出入于煙
雲水月之間一爲悵望左上爲四賢祠前三賢復益
唐李鄴侯泌也蓋杭地近海民久苦江水鹵惡至泌
始開六井鑿陰竇引湖水灌溉民得其利然湖泉葑
蔓易壅六井湮塞隨之後李能修其業者白後白能
修其業者蘇杭人尸祝三公有以矣夫三公文章政
事無論也而處士以清風高節雁行俎豆士迺猥云
窮達哉已至武穆祠墓肅衣冠拜謁至瞻遺像繞墓
三帀南枝蕭蕭秋風颯然便欲泣下汝定持巨石擊

武林遊記

三

檜賊頭聲硜然稍爲吐懣歸舟復泊漾碧軒臨臺小
坐遊人縱橫歌聲笑語頓失秋山蕭瑟已而明月滿
湖矣復次望湖亭平波印月遠樹籠煙野色蒼茫漁
鐙隱沒心境一佳汝定益卿清興遄飛鼓余仍勿舟
而命趾隄間花影交錯至景物尤佳處輒趺坐玩視
命酒三四行而歸旦日爲十四矣湖境已涉遂屈指
南北山早起詣玉泉泉池可畝許隱隱見泉從石隙
中迸出因詠樂天詩湛湛玉泉色悠悠浮雲身閒心
對定水清淨兩無塵心賞之元時舊畜五色文魚爲
遊人奇觀客秋一夕爲盜所盡傍泉遠近千畝轉灌

悉仰給泉云已至傅家莊小有泉竹之致已至集慶
飯畢取道三竺孤峰插天竹木參雲過嶺至呼蟻洞
晉僧慧理嘗畜白蟻六朝僧智一亦畜蟻于山每臨
澗長嘯則諸蟻皆集故以名洞洞止一石號益卿曰
積陰之中懼有毒焉余不敢入蒼頭以火礮投入其
聲通山後乃知洞深不測也已至靈隱殿燬而新剏
唐人蓋多詩詠宋之問有云樓觀滄海日門對浙江
潮今寺前據山不識所謂山麓有亭卽冷泉也泉從
石中泠泠而去奇石纍纍皆如刻珪削玉森立其前
緩步至飛來峰飛來又名靈鷲晉咸和西僧慧理來

武林遊記

四

登斯山歎曰此中天竺國靈鷲山小嶺不知何以
飛來故峰有二名峰高不踰數十尋而怪石壁削若
駭豹蹲獅衡從偃仰益玩益奇異木突生巨石中根
出石隙遂合爲一其下三洞委蛇相屬巖扃窈窕屈
曲通明懸泉淅淅乳溜垂垂或圓澤似蓋或絢綵如
霞不可名狀盤旋稍憊就洞中小憩此時前後應接
不能默識躍起復繞之二市上下藤蔓入左出右柔
身入石穴然燭究洞底有徑必窮迺自快然猶不忍
憩爾冷泉復徘徊澗底臨流枕石偃仰少選率爾成
詩寄志起來明月已在峰巔松蘿弄影矣歸寺坐月

文昌殿前念明日南山諸勝欲稍畜精力遂各就枕
早起至龍井泉泉味澄冽中有藍魚盈尺出沒旁穴
寺僧言其寺有十景因導余一一識之辟塵鑪乃宋
時一石鑪瑩潤如玉惟一足微損神運石高可六尺
許奇怪兀突有木香穿繞竇中正統間中貴李德因
早合力士淘龍井中得之上刻神運字有多款識然
漶漫不可讀矣一片雲石高丈許玲瓏若鏤刻在鳳
凰嶺又上則獅子峰一石儼然肖之餘所稱浣花池
插劔泉浴麟池仙人洞過谿亭皆湮沒無足稱僧復
延至其精舍曲折幽藏圖畫滿壁依山開窗巧石縱

武林遊記

五

橫汲泉烹龍井茶飲之已至煙霞洞石脂凝五色如
霞可三四十步擴然開朗後漸窄深入不可測聞杭
人以雄黃塗身持火入取白泥作餅粉進數里未竟
其底也洞右百武有石峰下垂曰象鼻石刻肖已至
水樂洞水從洞中流出清響如樂取道南高峰益卿
汝定疲矣余獨鼓舁人往絕頂極峰石竹木之勝東
可瞰湖山南頰大江第爲蔥蒨所翳不能遐覽時桂
叢盛放飄香滿山歸途袂拂峭石肩摩青篁反曳徐
下復苦易過已至八仙臺乃何氏宗祠無他致已至
石屋洞洞開廣度三丈如軒榭所恨四周皆刻佛像

天巧削盡前飛來煙霞亦然傳皆元時胡僧所爲洞
底窅窄不測中貴孫隆復立石門限之是日十五杭
人競將泛月而陰濛作雨余亦促歸從六橋池運而
西得飽長隄兩湖之致道經陸宣公祠入謁祠前臨
湖甚敞麗抵昭慶暮使童子覷湖隄遊人作何狀歸
報寂寞甚迺就寢中夜雨甚晨復雨余曰度不能久
旅吳山之勝可奈何皆冒雨行入杭城雨迺漸霽貫
城中闐闐之盛自金陵而下無其比已過吳山曰吳
山者春秋時爲吳南界以別于越故云從高下瞰萬
戶鱗櫛市聲襍沓耳目俱勝更上謁子胥祠所謂十

武林遊記

六

廟者惟城隍廟眺江稍佳耳竟至瑞石山秀石玲瓏
愈上愈奇堪與飛來峰石相抗而獨無佛像削損上
有紫陽菴丁野鶴遺蛻在焉更上爲橐駝峰雪風洞
洞不甚深余與益卿汝定僧惠谷坐于峰下四周峭
石聳立當空一石突兀上覆時復雨天光漏處淋漓
滴瀝而巨石所覆恰庇一几四人更尋徑至絕頂近
俯闐闐遠眺湖山大江蒼茫俱落眉睫曠然大快余
謂遊之益人多矣山岳之峻絕江湖之浩漫皆令人
有萬仞壁立百折不回之思而煙雲變態洞府幽奇
又令人飄然神往一洗塵世之想至于登高俯下千

里極目天地戶牖萬像晦明當此之時其境有不可得而言者矣故余自觀海之後復一快于茲山云復出清波門至萬松嶺松已濯濯矣至萬松書院宏治中參政周公木燬報恩寺而建大成殿中設先師像及四配十哲余恭謁畢殿後爲明道堂堂後爲周程張朱五先生祠旁出則艸莽中楚楚秀石卓立舊有軒亭已皆荆棘矣更轉徑則臨湖山地境絕佳志稱有浣雲池不得其處白樂天詩白雲本無心舒卷長自潔影落一鑑空可浣不可涅鳶飛魚躍間上下俱澄徹此意難與言覽之自怡悅旨哉其言矣以余所

武林遊記

七

見在處佛殿鼎新木聲丁丁不絕至此獨草棘淒涼一望蕪穢何也一爲慨歎復自六橋隄還山光水色取之無盡抵寺大雨踵至明日雨不可出又明日爲十八僧邀觀潮復自六橋隄往冒雨出復稍稍霽取道至虎跑泉一潭澄泓寺僧言舉呪誦經可使其泉貫珠而起余心私謂動靜乃泉之常耳與益卿傍闌觀之泉忽躍然珠起觀壁間坡公有詩刻碑余甚取其因病得閒殊不惡心安是藥更無方之句和詩有鳥嘯深樹僧方定花落閒門日正長亦見風致已至眞珠泉澄碧可愛已至江頭風靜波平雨晴山澹景

物殊佳觀六和塔徐步江濱俟潮江濱人云今年潮不波索然而返余觀志知浙江潮不波甚非國家所宜復動杞人之愚矣自一橋舍舁泛舟而歸十九日浩然歸念蒼頭束裝余欲授書肆中以葉舟泛湖至湧金門貫城步歸湖山煙光縈帶兼以雨色淒淒歸舟返顧猶不勝情越二十五日抵蘇門旦日至虎邱少步而歸

志正氣豪文采颯發後來闡淡靜深之基築于此矣蓋正初未見此記以爲三時之嚴潔是精進時水居之淡曠是得手時可樓之隨寓無心是結果

武林遊記

八

時未知其三十以前英豪忼慨錦心繡腸有如此者緬想陽明先生文章氣節事功道德無所不備可謂本朝第一人愚謂陽明第一才人非第一學人也高子不及者事功爾然陽明嘗荅人云吾請盡捐所長亦不失爲全人此可參兩君子之學矣君子多乎哉門人嘉善陳龍正謹跋

增錄

摘錄三時記二則

翼晨五弟先別歸日葵四弟則西湖之興躍如也八月二日至嘉善弔璞齋父母之喪璞齋病已黯然不欲勞之小語而別三日至樵李拜吳海洲弔朱虞封公之喪虞對畱晚話四日海洲約飲于煙雨樓竟日六日至武林寓大佛寺湖山在軒几間昏旦弄色媚人舍館定與日葵四弟往訪舊寓僧寄滄遇吳子往陸古樵古樵名粹明廣東新會人萬里孤身東遊訪學三年矣子往見而奇之朝夕與俱其人清苦澹

武林遊記

九

默終日靜坐或至閉戶經月與之錢則辭與之衣寒則衣之煖而返之井然不苟也問其所從師曰朝陽蕭自麓問其學曰主靜謂子曰只要立大本一日有一日之力一月有一月之力務要靜有定力令我制事無使事制我余深喜其言又嘗謂子往日靜後覺真氣從丹田隱隱而生予又懼其誤認主靜之旨也子往有小舟如葉攜入湖中午後余五人共載而泛張布颿信風所之甚見氣象遊淨寺而歸賦詩志之八日蚤起獨步山薄中或登高而眺或臨水而坐悠然于無人之境別有一種意况午歸小憩再與日葵

四弟步六隄帶月而回至斷橋月佳甚命酒而飲各有詩句酩顏抵寺則子往古樵來言如此良夜不當泛舟邪五人別坐一舟蕩小舟取酒童子蹋而敲水注入盡溼子往所攜興沮而回余謂一日中所得于山水者多矣進而不已宜其咎也九日與日葵四弟出遊至高麗寺遇雨雨止往法相寺飯後觀錫杖泉叢桂盛發亞覆泉上醴芳清響極一時之勝相與樂之遂止寺中明日遊石屋水樂洞至滿家莊觀桂則桂已後時遂往五雲此武林諸山最深處所謂九溪十八澗者兩山之間泉凡九深澗凡十八曲五雲于

武林遊記

十

諸山最高諸山至此而盡山外則大江矣從絕頂眺望大海莽然江流縈繞千山蹲踞收入一覽更無遺恨飯于山菴取道天竺上下岡巔昇人指點頗得兩浙之概復遊飛來靈隱而歸十一日丁長孺至日葵四弟別去執手不免悽惻一笑而意解十二日王洪陽公以書來因託寄朱鑑塘中丞遂確齋兄書午後長孺約遊湖小坐蘇隄月色不佳興亦不至朱梧峰聊爲鼓琴夜色淒淒懶緩而散十三日洪陽來余以野服偶寓湖濱不能入城交際遂謝不見方散步歸則錢繼修傅太恒持舟來拉往晚泛太恒復云開尊

昭慶以待夜談舟抵寺前維于池岸岸狹水齊予旣短視暝色蒼茫遂步入水中太恒急命僕援之不至狼狽一時解衣驚迫之情更深見其交誼也更衣入寺長孺亦至呼酒大浮酒酣耳熱日間偶聞一士人炎涼之狀深愧其復負時名偶爾談及抵掌盡發繼修太恒俛而聽之余遽省其非別歸就寢思一時言行俱失三復小宛之六章不能成寐明日范熙陽公枉駕亦謝之余欲湖上過中秋且觀潮而去及長孺來隱蹤遂露軒蓋時臨不可居矣遂行長孺送至江口小酌六和連日意態頗倦此夕明月臨江不能飲舟慨然作別十五日五鼓渡江

武林遊記

十一

酒亦覺幽蘊內攻不暢諸外也長孺復遠步送余登廿四蚤至杭州寓元妙觀范熙陽來相對半日絕非世情別去買書肆中時以范平麓之死致逮彭直指魯軒王洪陽亦革任每逢父老輒詢其事無不扼擊歎息謂二十年來未見此撫按民之不幸一至于此至言范死之故則直指絕無搏擊之實中丞更博大裕民時論之鑿甚矣廿五宿舟中明日大雪思湖上之勝神興飛舞而蒼頭倦遊卒爲所尼廿七至唐棲弔卓月坡之喪穉成兄弟畱小坐會胡元敬休仲之

尊人也一市賈耳三十喪偶遂絕欲不娶二十年來
稍稍知讀書求身心之要奇士也休仲亦沈潛向裏
與卓穉成吳子往三人爲同志之友蓋俱有拔俗之
韻焉談夜分而別廿八復雪三日不霽東風逆舟日
行數里初一至嘉興風雪益甚遂易小舟而前至新
安訪華蠡陽踐別時之約也秀谷在焉遠客初歸故
人握手問得庭闈無恙便呼酒自慶一時風味殊不
可狀酒酣下榻覺而辨色矣急起登舟至家時二月
四日也秋往春歸凡歷三時云

流芳亭記

光緒癸巳冬日
錢塘丁氏刊行
秋圃蔡玉瀛署

乾隆杭州府志名宦傳

何玉如字淡巖洛陽人順治乙未進士知錢塘縣甫三年凡所爲勸課農桑招集流移興崇學校綏輯樵採無不備至催科行以撫字聽斷極爲神明錢塘下鄉當茗水下流而餘杭南湖又以錢塘爲之咽喉南湖一決未底太湖下鄉先爲巨浸玉如以餘杭茗溪雖他邑事實一郡所當爭者因請于巡撫范承謨隨檄玉如開濬南湖以太湖承其委而杭郡均受其利民咸德之又數年陞保定府同知遷山西大同知府

流芳亭紀

侯九載恩膏萬民思慕總維巨槩善政實裨蒼生原本淵衷碩畫堪垂奕世平陽秩滿沐浴猶新廣昌勤民鄰境益切俾去後咸思遑事呼籲攀轅而靡從來茲其法章程永志芳規於無旣祇緣遵 禁之嚴不敢頌德虔按案牘之實敬勒貞珉謹紀

公姓何諱玉如字璞公號澹巖河南洛陽人由乙未進士筮仕錢塘邑令於康熙三年三月到任九載奏績於康熙十一年三月陞任北直保定府同知於本年九月榮行

流芳亭紀

一催徵錢糧向比見年以致胥歇包攬頑戶抗延官民交累我侯蒞任思利民以利 國首革耗羨令民自封投櫃條陳積弊設單次序傳催不比見年單頭專摘不完欠戶除積年役困行落甲徵輸節省妄費正賦克完儻拆銀青潮缺欠曉諭驗明補足竝無差擾歷年錢糧照額全完一徵糧立法專追頑欠不比糧里單騎臨倉盡革姦歇嚴禁陋弊不飲勺水近奉八月開倉之令各邑九月徵比致糴客米應卯民受刑責且多典鬻之苦侯曲體輿情必俟本鄉米熟寬至十

月起限十一月徵收臘月完兌竝不箠楚而糧米全完絕姦歇之侵漁杜悍丁之私貼首先開幫過淮屢邀獎薦今蒙督撫兩院採訪良規會題永著爲令不特本邑受福抑且三郡流膏一邑居首衝駐劄滿漢重兵侯凜遵功令首重緝逃親獲逃人劉文遠等百餘名審實旗主姓名在逃月日隨解歸旗兩經題敘連加三級一凡獲逃人恐其心懷不軌貽害地方不緩時刻惟錄初訊口供禁絕仇扳解憲鞭刺歸旗絕無妄扳窩家之害積弊頓除小民免累

流芳亭紀

二

一賊盜誣扳大爲民害或挾有心仇或捕役唆使或通獄妄扳候獲到審定初供訊果無干卽時釋放嚴究唆使懲治罔遺眞盜服辜良民樂業一奉文丈量侯採訪輿情條陳詳請出示曉諭稔知小民疾苦嚴禁騷擾令民自丈造冊悉從新丈起科請豁產去賠糧之累不獨錢邑邀恩闔省民皆霑惠

一遵古制每社諮詢約正約副以禮聘請侯刊布六諭月吉宣揚勸立義學使民講信修睦或缺司事公請年高碩德不願者不强嚴禁蠹胥借

端擾害良懦勵俗維風一時丕變

一浙省陋俗棄嬰溺女最慘侯准諸生陸元章條陳詳憲倡建有嬰堂招僱乳母育養棄孩禁絕溺女示誠諄諄挽回薄俗至育嬰資費侯捐清俸每年申憲樂輸慎謹出納詳刊徵信錄永立良規

一所轄塘壩惟化灣陡門最險上接天目萬山之水勢衝激下關嘉湖等郡之國課民生緣歲久傾圮一遇春雨秋霖勢如倒瀉人禾屢遭湮沒大工厯載難成侯深知公帑艱難首倡捐俸

流芳亭紀

三

辦料鳩工詳憲亟爲培築聞風慕義共襄盛舉旱潦有備各郡咸感永利於不朽云

一縣治隸於省會襟江帶海設盤熬波每多姦民私販遂致商引壅塞侯念鹽課攸關嚴捕緝獲私鹽船犯定罪解院姦民知儆商引流通至鹽捕燒詐良民累難枚舉侯加意懲除鄉民免害一杭俗健訟侯蒞任勸諭諄諄示令惜財忍氣不肯輕准一詞與民休息及遇人命盜犯必親檢驗確究贓證立時剖決惟欽憲及應理戶婚田土等事悉令原告自拘庭鞠時開誠勸諭平

情逐釋而獨嚴假命假盜及誣駕通洋光棍審實必按律反坐年來唆訟刁誣之風頓息

一縣治山水迴環戎易伏莽侯設法堵禦訪緝盜窩盜綫詳憲嚴編保甲令民守望自衛夜巡寒暑不輟地方盜賊弭消民生安枕

一辛亥夏秋旱魃爲虐民多疾病奉部院劉各憲捐資立局置藥延醫普救侯日親臨勤宣德意捐置器皿施茶以濟病渴活民無算功在一時芳流萬禩

一欽奉

流芳亭紀

四

恩詔事一案官員捐輸備賑侯三年共捐穀一百八十石建倉積貯備賑

一監牢原爲重囚而設侯惟將其株連槩准保釋竝不濫羈至於獄犯有病令醫治療冬施衣薦夏運茶漿痛禁獄卒凌虐親臨點驗無虞非獨慎重民命亦以推廣好生一喪殯忤作扛擡挾爲奇貨不容攙越杭民貧富遭其荼毒紳士亦皆不免奉憲採訪飭議侯三集紳民於明倫堂盡革前弊嚴拒請託不許分坊坐日聽民隨便倩人及鼓吹夫役瓦費皆爲

汰良規飭禁永爲鋤暴安民之鑑

一丙午臘月十三日太平坊火災延燒九里難民凍餒於冰雪者以千萬計有鄉紳陳捐銀五十兩創始力詳各臺捐賑侯出俸救濟難民無算

一辛亥八月鄰火延燒幾及郡庠 聖宮侯首先救護率眾撲滅幸止焚東廡賢位缺失西廡亦多散逸侯重整兩廡賢儒木主煥然一新又本庠明倫堂疏勸紳士襄助重建

一救荒全在積貯侯素講求紫陽先生社倉遺法爲民禦災備患後因水旱頻仍有志未逮今侯

流芳亭紀

五

遷任而諄念善事未舉加意諮詢條列通申以誌侯不忘吾民本意

一侯公餘季月課士端心術而正文風加意儲才賑貧生而獎俊乂斯文振起國彥聿興

一春秋次丁例祭 先賢祠祀大禮攸關向來視爲具文侯以至誠相感對越維虔凡 先賢忠烈躬親與祭明德維馨靈爽妥侑

一本邑額設緯夫乙酉離散以致撥民扯緯不諳江山之險遂冒死亾之憂侯設法補救津貼船戶帶緯不撥里民且爲久計召募小民童明等

具認愿充額夫一百六十七名額給工食恐後
差浮原額仍復累民循例僻縣協濟詳憲嚴飭
勒遵永甦民害

一西南各鄉民賴山花辦賦資生兵廝混砍果木
流毒地方侯詳憲特遣差員巡拿緝禁民困獲
甦

一任內水旱頻仍災荒迭告侯齋戒越宿步禱維
虔隨求隨應雖天災流行莫甚於庚戌辛亥我
民幸得安生樂業不至流亾視他郡安全倍勝
一頻年爲饑荒所迫仳離是傷若鬻子鬻妻鬻身

流芳亭紀

六

於營者情實可憫侯捐俸有差悉向旗取贖詳
憲立案致令父子夫妻完聚民多感泣

一康熙四年至今侯收恤無倚貧民嚴龍張氏等
共七十一名補入養濟院食糧不使衣食失時
一侯蒞任來捐俸給工掩埋暴露無主大小棺木
五百餘具徧拾遺骸擇地埋葬無算

一錢江爲省會首衝八閩孔道凡 皇華官兵過
往需用船夫糧料什物供應繁艱侯咄嗟立辦
不擾民間卽鋤草支更夫役詳憲禁除永免民

累

一境內河道自江干穿城至湖墅一帶上通閩廣
下接江南爲商貨往來要津侯屢加開通又中
宮等橋小河關係省城血脈向被估塞漸成平
陸均賴力行清濬

一西湖一帶南北兩山向有先賢忠烈祠宇暨
古刹梵院歷代敕建攸崇每有兵廝牧放牛羊
羣聚雜沓侯申請憲禁兵廝玩褻聿隆盛典

一侯蒞任至今凡用米麵蔬薪棉布等物俱發現
銀悉照市價平買不取行戶

一庚戌辛亥奇荒侯糴粟賑饑又奉各憲頒給官

流芳亭紀

七

米賑濟侯親臨阡陌察荒深淺逐名給散戶戶
皆蒙憲仁粒粒皆是實惠

一奉上行提解屢有姦役匿批作弊日久滋生叵
測侯詳憲通省槩用編號循環連批上下易於
稽查永除匿批之弊

一奉安插投誠總兵阮鄧等數百員兵丁數千名
侯酌議居住兵不露處民無擾害

一康熙五年正月奉憲派造艤艫水艫戰船侯委
的當官役星夜催僱捐犒匠工首先告竣赴次
一近城各里田畝營馬就便放青遍被踐食民不

堪命侯單騎親驗通詳院憲移會將軍嚴禁放
青蹂躪有裨地方

一奉憲派羅木營建造營房一百間刻期告竣安
插閩來投誠官兵吳朝宰等駐劄侯日加督工
爭先造完竝不愆悞

一編審爲十年重務事關 國計民生向來姦胥
里蠹弊害滋甚侯加意釐剔徧訪周咨害革利
興裝圖則聽從民便以免遠撥之虞清丁則單
騎親臨以杜多役之擾逐戶挨查除補出自親
裁竝不假手胥吏非特一時惠民誠爲永久良

流芳亭紀

八

法

大清康熙壬子嘉平月上浣之吉郡邑士民公立

流芳亭紀終

雲居聖水

寺志

蔭椿
署檢

乾隆二十七年壬辰
刊成越百二十季光
緒十八年壬辰重刊

雲居聖水禪寺志序

雲居聖水禪寺者地接兩峰名齊三竺帶海襟山之
所法宇宏開龍飛鳳舞而來琳宮矗峙層巒絕巘闖
見山門白石青苔疑來仙洞近挹湖邊秀色揜映松
關遙傳江上濤聲悠揚梵咒宜卓錫之高人踵至而
攜瓢之韻士聯踪然非載筆而載言奚以徵文而徵
獻必有資乎慧業乃克永夫勝因粵稽禪寺創自李
唐綿亘千年鐘簷無恙遞更數代榱桷維新溯厥開
山道膺因雲居爲號洎乎奕葉中峰合聖水成名仰
金碧於烟巒詢經營於慧衲風車雲馬常駐靈旗暮

聖水寺志序

一

鼓晨鐘時聞法誠皆資人力用妥神庥然而玉梁飄
渺銀殿虛無給孤園中數聲鷓鴣靈光殿外一片荆
榛若無子安之碑誰知淨土使非休文之記詎識法
王紺馬青鴛藉詞章而不朽龍宮象塔因翰墨以常
留鼓若海之文瀾慈航寶筏燦生花之筆綵蓮座香
城此尋奧旨於六通固在語言之外而證妙諦於三
藏不離文字之中欲示畱貽須憑記載志書之作烏
容己已顧寶笈難窺草創始於寂湛瓣香已遠重纂
在乎通淵卒業未成舊章誰續乃有雲巢衲子者有
如支遁居白馬以談元略似晦堂住黃龍而作志從

源達委井井有條別類分門班班可考情最耽乎吟
咏後復附以詩篇允矣梨棗之光可推鴻筆採茲芻
蕘之句屬以弁言楷也禁省周旋鄉關契闊童子嬉
遊之地爲念林邱詩人恭敬之思詎忘桑梓今則遂
初已賦儘幅巾朱履而歸方外與遊可蠟屐芒屨而
至 錫香山之鳩杖陟險非難主松嶺之鱸堂卜鄰
伊邇因名求實援古證今倍領妙手之空益信良工
之苦每掀髯而大噓何必坡仙或並轡以聯吟相逢
島瘦又況右文有典重羅碧海珊瑚茲雖史乘小言
總屬吉光片羽曾聞半偈空彼萬緣還見五雲生於
二乘哀然成帙君爲夾漈之所難率爾操觚我恐溫
陵之騰笑矣時乾隆癸巳四月初吉仁和七十八歲
老人陸宗楷臯川氏序

序

國有史家有乘所以原本大業而永世也而郡邑而山川而輿區古刹志猶是已杭城吳山之陰曰雲居在大江以西余數年于浙未嘗過問己丑乞休寄跡南溟見僧幻因所藏中峰祖師親自寫照及手置壁間諸相次觀麻鞋髮珠諸盛蹟乃知斯因師著天目雲居並峙大雄匪凡近也顧猶未詳夫開山得名之緣起有僧休復雅懷續述示一編曰將有志而未逮本末條理燦然可觀泝自唐咸通中玉田道膺禪師由涿州住江西雲居山既而至杭結茆於斯而不忘

聖水寺志序

三

雲居仍以名菴至明以聖水寺并入乃稱寺然則中峰此山振起之少祖道膺此山肇基之初祖也然則山非浙寺非自唐宋元而菴非自今也然則一雲居江可也浙可也菴與寺無不可也然則無江相無浙相無山與菴與寺相何爲雲居是爲雲居然則卽一雲居曰江曰浙曰菴曰寺非名非非名可說不可說已縷縷矣謂可無以志之乎況乎祖風爲烈天如無念輩繼武龍象東坡松雪陽明輩暉映後先湖山奇濤江海大觀以暨一石一木都堪譜牒奈何聽其落落無述合後之人若今視咸通以前莫可致詰乎誠

哉休復是編之弗可已也而屬余一言亦似弗可辭
何也雲居爲吾鄉名山十年來顓愚衡大師自五臺
歷南嶽清源至止余實荷法施其在杭也嗣中峰法
者首推天如卽我廬陵人且中峰證祖位彰隆號而
垂藏法吾鄉揭曼碩爲贊其詞而余之藏疾于斯亦
敬入告矣則雲居之爲雲居

聖天子旣耳目及之余之于雲居也亦旣辱指十手
雲居也余也豈無因緣于其間余何能辭一言也順
治六年冬十月豫章周漢傑拜撰

序

凡都會必以形勝財貨之所聚人文之所毓技巧之所出於以醞榮饒而傾恢詭匪細也武林甲寰宇郡兼山川之美波迴麓抱更僕數未殫顧率郭外名藍或以爽塏或以幽奇著若憑高而江湖生於屐底則惟城中之山爲然昔越沼吳以此置吳社然由伍行人祠循而南至三茅觀道院十九類顯拔千尋縱眸卽見再折而西藏鈴鐸於蒼蔥磴而下磴而升高楓負湖鳳凰諸山出於列雉惟雲居寺爲然寺緣僧道膺卓錫開山名新志舊大德間起英流競賞獨志缺

聖水寺志序

五

焉亦子瞻孟頫之遺憾也夫蘭若或牛吼不及或離聚落五里茲寺隱輟肩之中窅如絕壑嶺足卽市闐廨舍萬猾嘈囂都若隔世惟鳥語蟲鳴而已然則有三竺之谿山四合而無車騎列肆之豔雜有靈隱韜光之林木森蔚而無燐明虎嘯之蒼涼有昭慶之人烟湊集淨慈之獨踞連岡而無嚴闔夜閉當塗晝呵之驚虞誠攀躋之所必至而眺覽之所首推者也宜中峰薰脩於斯梅詠芒鞋猶存人世厥後寺幾爲勢力有賴精齋以死獲全暢宗風而持覺苑不可泯滅拈花漬羽其揆一也寺有二徑一從鐵崖嶺一從青

屏山奇石妙樹天巧布錯違歌鐘於頃刻無裹糧於
十里塵念不雜于此中者代固不乏人卽偶至者亦
自能識取也聞之長者云雲居之松不獨松樂亭爲
最隨地挺蚪飛雨間不容髮亭旁爲官長張筵騶從
伍伯所戕更有不堪述者其他可令久而或湮哉則
茲志信當作矣浙上傳巖書

序

名山古刹之形勝人物郡乘邑志有未採輯者則各成一書詳紀其鉅細以信今而傳後或名流或高僧窮年矻日殫精鉛槧惟恐一事一類之不備不彰以爲山靈佛祖羞如通淵實懿之志雲居聖水寺是已寺建自唐咸通中爲佛印中峰柱錫之所其地爽塏幽異襟江帶湖跨吳山之西偏與天竺靈隱並稱古刹千百年來緇涅之接踵賢豪之萃止殿宇之脩葺文物之昌熾郡邑雖載紀之通淵以其不能周該備至且懼歷代久遠易湮沒而無聞也遂取寂湛草創

聖水寺志序

七

之原本重加擴摭不漏不支成志六卷俾天下後世莫不望武林而思名利瞻經幢而景蘇趙卽或給孤園圯布金地廢而雲居聖水之名猶表表塵寰間也世之士大夫悠悠忽忽于郡邑之志乘漫不加意卽其家世譜牒亦茫然烏有以視通淵實懿之用心顧何如耶余家居時雖于祖德宗功暨桑梓之耆舊粗有紀刊而學識淺鮮不能纖悉具陳至官仁邑于地方之風土人情因革損益之規縱不敢以無才自諉而邑志未暇修舉今對通淵不亦赧赧然有愧色乎而凡吾儒之閱是志者固不特嘉通淵實懿之願力

茲寺賴以不朽亦可借以自勉勤于家譜邑乘之篆
訂以光照 國家之盛於無疆也是爲序
年歲次己酉仲夏月上弦日

勅授文林郎知浙江杭州府仁和縣事甲辰科浙江
鄉試同考官荆門胡作柄撰

序

雲居寺志先師尊誅湛草創於前吾師通淵掇拾於後雍正己酉仁和邑侯荆門胡公罷官居寺甄綜而蒼萃之遂成完書科分條貫可謂備矣顧三十年來佛舍僧寮金碧輝映於山水間者化爲烟雲圯爲瓦礫見于志者十存四三而已可勝慨哉夫志以傳信倘不重爲釐正一切仍舊則名存實亡將使覽者按圖索駿視爲誕虛不且貽四方之誚乎懿因不揣譎陋於山川泉石之不變者悉仍前志其餘蓮臺香藏則據現在具書之已廢者詳於古蹟一門庶幾不戾

聖水寺志序

九

傳信之旨方今

聖天子

勤咨吏治

隱念民生四舉

巡狩之典湖上諸名利無不鼎新以備

皇上恭祝

皇太后慈釐純嘏而我佛亦祥雲曖日香雨灑塵釀和氣於翠華遙蒞之辰於以媚

一人而成

景運者寺僧或裁新志或益舊文極古今之盛焉雲

居雖僻在吳山一隅然峰巒聳秀江上數峰湖間諸
嶺縈青繚紫如繪如畫映帶左右者一憑眺而悉在
眼前安知無大檀信廣結善緣捐朱提貫赤仄以完
舊觀爲後日

皇上拈花獻佛之所則志誠不可以已也因購梨棗
而急刊之釋實懿撰

聖水寺志序

聖水寺志目錄

卷之一

形勝

建置

卷之二

祖師

耆宿

僑寓

靈異

古蹟

卷之三

題詠

卷之四

法譜

聖水寺志目錄

卷之五

贊偈

卷之六

清規

補遺

聖水寺志目錄

雲居聖水寺圖

聖水寺志圖



身如天目山
 寂然不動尊
 慈雲灑法雨
 徧滿十方界
 化身千百億
 非幻亦非真
 覓費不可得
 為師作贊竟
 至正二年正月
 月八日弟子
 吳興趙孟頫
 林香謹贊



聖水寺志圖



聖水寺志卷一

誅湛同明倫原輯
通淵同實懿重纂

形勝

吳山又名七寶山突起會城東南隅縣亘數里邈迤而西蹊逕幽邃峰勢秀削憑虛卻立左吞江光右飲湖綠風帆隱現於林隙遊舫蕩漾於巖坳前則雉堞橫雲縹緲如帶後則嶺如屏幃青圍翠繞蓋奧如而具曠如之觀不獨爲茲山之冠卽兩峰三竺未便過之其天設地成之勝有足稱焉志形勝

聖水寺志卷一

一

山在郡城內七寶山西南隅左江右湖面坤負艮東則橐駝嶺下抵清屏山西則鐵崖嶺北則紫芳嶺下抵郭璞井南則崇墉百尺列若屏垣幽深靜謐迴隔囂氛誠勝地也

鳳凰山脈來自天目爲郡主山昔人所稱龍飛鳳舞到錢塘者城踞鳳凰左翼城內諸山緣祀秦伯伍員總謂之吳山

雲居山在杭州城西南隅面聖湖倚楓林頗稱佳境

杭州府志

三台石位置端拱儼然列宿

三台石記荆門胡作柄

三台石為雲居寺十景之一

在山巔路險仄皆聞其名未嘗至其地也夫泰華
嵩衡之高入往躡層巒絕矚矧躡步之前數
仞之勢僧乃憚于遊乎遂獨步寺門外歷磴十餘
級稍折而西覓徑而往是時午日當天清風拂地
不數百步即見所謂三台石者斜對上方菴後
枕女墻左挾西湖右瞰錢塘江如劍戟列如虎豹
伏高下其形其數有六昔之人蓋嘗徙倚摩經
以嘉名厥後繼踵者少徒付之荒烟蔓草歷歲天
年曾無有過而問焉者豈非石之不幸歟雖然
下事亦何常之有有者豈非今日之聞其名即欣
造其地不假賓朋之從不待盃酒之攜相與倘恍
流連而不能已耶又豈非斯石之重幸與獨是
三台者斗魁之下有六星天下治其象平所謂泰
階平是也世人且以三公之爵茲石何以名耶
星宿之精下而為禽獸隕而為石豈山三台之
星有時隕耶抑其名之精耶求其故不得乃憑石而寐
對象於台星故名之耶求其故不得乃憑石而寐
忽有謂予者日子不記五雲多處是三台之句耶

聖水寺志卷一

二

名石之意是使人觸於目感於懷而不禁望闕懷
恩之思也予遂恍然而寤見有人立麓下是豈夢
中語予者耶諦視之則上方菴之樹影著墻耳渴
甚掬水飲之若飽因思明月之下攜斗酒面石而
飲豈不對影成九人耶遂與石
訂再來之盟踏夕陽而歸寺

三台石釋實懿雲巢

三台異頑石間氣結噴岈峰峰
距咫尺朵朵空中攢象緯繞山

靈列宿曠奇觀秀削
高城上清風落暮寒

江櫺石高數丈屹立城隅洞穴玲瓏瞰望平沙極浦

有如窗牖江櫺之名以此

龜石規圓二丈餘色緇而潤皴以細紋斷續如卦形

首昂背俯狀甚肖

朝陽洞在嶺上吸受朝暉通明晃耀故名朝陽

呂字巖在東嶺之陽立石數仞洞穴雙朗上小下大有似呂石字

聖水巖在紫芳嶺半有巉石突兀高大約四五丈勢若垂雲下有瀦水停泓冬夏不耗今則為崩土所淤矣

三佛泉昔中峰和尚闢地夜見草莽中碧色光起得古井浚之獲三石佛首相既莊嚴泉亦甘冽元巴西鄧文肅有序銘見杭州府志

三佛泉記銘鄧文原泉在七寶山雲居菴沙門指月而大之夷高就深出土盈尺得古井甘而易涸歲甲子復深之去木與石復得晉井甃甃堅完距地

聖水寺志卷一

三

餘四尋寒泉芳冽汲用不竭越有神異見石佛首三諸相具足於是續以貞珉塗以黃金諸比丘眾恭敬圍繞歎未曾有已而鄧艾文原為之銘曰我觀大地積水所載孰疏鑿是太虛無外掘地及泉視之縈帶如履冥途破諸障礙其源淵谷其瀉湍瀨不止不流以與井會瑞相現前示我三昧彼壞者石實相不壞是實相改偏河沙界以一勺甘除世濁愛是相是水無在不在我作銘詩以驚盲曠

一滴泉在山之東石上有蘇軾錢勰江公著柳雍元祐六年三月七日記又東坡刻詩于旁今模糊不能識

題一滴泉蘇軾東坡一菴高隱古城邊半是山林半市塵月色透窗霜滿屋卧聞宰朝去

釋德一達方

石泉分聖水一滴似曹溪味得高僧別名從學士題苔痕浸墨潤雲影拂巖低

倚竹長吟罷城烏月下號

釋實懿雲巢

為覓源頭叩竹扉深林空翠溼人衣石含米芾三生秀泉落曹溪一滴微掬到

掌心清更徹嘗來舌本味還稀閒尋學士畱題處斷壁荒涼烟雨霏

燒香洞三字勒石洞側疑古多燒香於此

楓嶺高峰突兀老楓百株森然圍繞每一登眺則闔

郡形勝俱在睫下

建置

夫把茅蓋頭便開淨域雙樹說法即成叢林則地因人著不信然耶溯唐咸通間道膺禪師杯渡西江錫

聖水寺志卷一

四

飛東越入七寶山愛其峰巒深秀林木茂密結菴禪誦顏曰雲居洎宋佛印迄今中峰選佛場開宗風益扇易菴為寺金碧輝映於巖壑閒緇流問道勝侶題襟歷數百年無不知有雲居之勝者然則夷莠而基撥雲而廬締造之始其可略而不著使後之人無所考哉志建置

唐咸通中禪師道膺雲遊來杭愛此山麓之勝就樹結菴顏曰雲居蓋參學于豫章雲居山仍以二字名菴志不忘也

宋元祐間佛印禪師見聖水巖林幽勝遠隔塵囂乃

安禪以聖水名其寺

元初兵燹隳廢住山指月禪師謀新之躬請普應國師中峰和尚討尋舊跡芟去荒蕪重建前後殿宇方丈僧寮廊廡畢具大眾雲集復成叢林名與五山十刹並列趙孟頫手書雲居匾額及淨土詩迄今碑勒猶存

明洪武二十四年奉旨歸併天下寺院浙江布政使王鈍遂將聖水寺併入雲居菴奏聞賜額雲居聖水禪寺嗣後素菴朴禪師始建觀音萬佛等閣

成化丁亥燬于火素菴徒文紳首倡鳩工四方樂助

聖水寺志卷一

五

復建大雄寶殿琳紺莊嚴百廢具舉有逾昔觀落成於丙申之秋

宏治乙卯比丘道孜募緣重修海鹽沈衡有記邑人沈源篆道孜立石

寺牆週數百丈以近闔司署

今改爲學院衙門

歷任都師惑

形家言禁不使築康熙四十三年巡撫張泰交知府張恕可始斷令寺僧曙升心學復築之鹽驛道高能徵爲之記刑部侍郎高其佩跋並勒于石

寺自宏治至今幾三百載殿堂廡廡日就荒落其存者具書於左常住祭祀法產並附焉

山門一楹圯廢已久乾隆乙酉雲巢募脩

天王殿三楹高三丈七尺現大莊嚴額瀋陽李之粹書

對聯

禪心正與天心合

國法幽將佛法扶

佛生西域祥光現於周朝

法教東流金像夢於漢帝

禪堂三楹高二丈一尺

齋樓三楹

俱在天王殿之東今廢

聖水寺志卷一

六

中峰塔院三楹內瘞中峰祖師爪髮舍利有覺照堂

額雲間徐朗書乾隆己巳外麓崙山脩

對聯

天目同源舍利放光照法塔

幻住十四世

雲居分派淨土畱偈鎮名山

孫實懿題

遊雲居寺禮中峰和尚髮塔厲鶚太鴻

幽磴無人行露蘚綠相待倚山爲女牆春物見爽

嶺叢深鳥嚶嚶沙崩石磊磊長廊據寺勝酌泉散

憂痲恭聞大導師岳畔藏落彩

唐淨業法師塔銘高宗忌辰方階落

彩作禮向閒房真風故常在選樹坐移陰仰看雲

意改遊雲忽東南遐心渺江海

同作上虞石文真石

春雨回荒姿餘寒晴復陰逶迤步石徑禪室來幽
尋眾山已秀發綠淺未滿林繞寺雉堞壯入門臺
殿森阿師久西去遺屐猶至今妙相渺難睹默契
情更深合十向雲際恍聞淨土吟四體豈無愛諸
妄惟滅心緬彼紺螺色香土歲月沈但餘烟草碧
如絲緣塔侵平生慕禪意苦為飢火燻焉知此僻
境脩廊靜悄悄閑閑湖上景悠悠南山岑鉏聲編
芳野微風忽鐘音暫憩如有會虛寂歸冲襟

聖水寺志卷一

七

按蓮池續高僧傳云徧閱中峰語錄實未至杭聖
水蓋其弟子習靜之所然中峰題東坡大悲像記
後書云元至正題於聖水巖則住雲居蓋可信矣
前殿三門三楹

長廊一帶即西麓內麓外麓三房之廊一名看月廊

長廊縱步方九敘塵外烟巒倚碧空迴廊宛轉度晴虹樓臺近寺澄湖接杖履疑將法

界通 拍拍湖波遶郭長霏霏松雨灑衣涼尋山踏遍西湖路誰解烟霞屬上方

題長廊四明屠隆緯真烟巒最深處幽鳥嘯空山日暮蟬聲急松高鶴夢閒魚舟

花裏出僧展雨中還客去禪逾寂焚香獨掩關

步長廊西安張文价少谷往來高興發還共步長廊何處石泉響半塔瑤草芳

孤雲護巢鶴初月滿繩牀
供客足清茗何妨言笑長

長廊雨望南屏釋篆玉讓山

濛濛一湖雨倏忽鏡乍
函散入蒼蒿林盈耳鳴
松杉復嶺賸斜照倚天青
嶢嶢宛如井西畫眼渴
縈秋饒澹遠總詩思涼氣
歸單衫雲亦作幻住同
我還
重巖

壽春釋淨泓笠江

在山雲與住出山雲與遊
隨雲意自適逕折屢小休
石壁澹素暉夕照上簾鉤
羣彥欣所諧爽氣橫清秋
驕雷載雲起白雨滿山樓
迷濛湖上山遠帶嵐光
浮花氣靜不飛餘滴響深
楸新涼快披面一聽清溪流

釋實懿雲巢

結廬恰山凹面面嵐光連
萬象媚鳥下榻卧峰巔支
許不費招共詠長廊前古
跡瘞舍利時或吐雲烟俯
仰感今昔六百有餘年雨
聲倏西來雲氣霾大千一
望盡模糊萬物無姪妍如
窺米家畫潑墨空中懸如
聽陶公琴會心在無絃須
臾忽開霽涼意歸枯禪消
除煩惱障結

聖水寺志卷一

八

習清淨緣秀色接西爽雙
鏡明湖鮮峰峰新出沐
朵朵青插天塔影掛殘照
鐘聲起幽巖欄憑溼翠
裏大家
聳吟肩

長廊夜月實懿六字詩

脩廊最好明月清輝上我香
臺雙鏡湖頭映出四更山頂
銜來照眼金波影動會心
玉葉雲開宿鳥一聲岑寂
松陰又轉莓苔

西麓房素菴朴禪師

宿西麓釋法聚玉芝

遠徑通深麓齋居小更幽
松聲四壁雨湖影滿牀秋
世路迷真

境僧緣息妄求開門
漁筵近明月在滄洲
又白雲虛閣倚西岑
幽興撩人不倦尋鐘聲已忘城
市近松蘿忽見寺門深
干峰落日鶴相語一樹梅
花僧獨吟莫謂烟波總
遊事半湖春月共禪心

宿西麓朱朴西村

平生乍識雲居寺便欲題詩滿石
房千頃翠濤欹短幘兩峰斜日據

匡牀未經霜樹黃兼綠不出山僧老更
蒼西閣夜涼清事足一鐙疏雨漏俱長

西麓山房陳鑑句溪門開蒼壁山氣佳千樹萬樹生
莓苔堂虛白日有雲度地遠青

春惟鳥來石磴陰濃展孤岫林麓聲動喧
風雷猶記翻經待明月還從樹裏築高臺

過西麓山房錢塘秦舜友冰玉重湖浮樹杪短徑出
城頭千步迴廊寂雙

屏傍竹幽峰陰衣上合雲氣座
中流茗碗烹春雨因貪佛日留

東麓內房用彰紳禪師即素菴朴禪師之徒祕
山堂額西湖毛奇齡書

重訪素菴不遇姚汝循兩度相尋竟不逢孤雲何
處覓行踪禪關深掩長廊

靜積雪時
飄窗外松

贈內麓笑雲上人馬三才松里客子乘閒策杖藜白
雲深處訪幽棲相逢

得共高僧語一
笑還看過過虎溪

聖水寺志卷一

贈笑雲釋方澤白雲層疊臥青山似與山僧伴掩關
薄暮偶然飛出岫飛揚不及在山間

有時飛度海門秋蒼狗青虬幻未收
何似衲僧巖岫裏身心不動萬緣休

東麓外房守泉兼禪師用彰禪
師之孫

外麓山門聯蓮社臨湖三竺月波浮檻白
松關拱堞六橋烟翠疊堦青

天醫院聯橘井泉香大地無心融聖水
杏林花綻陽春有腳遍吳山俱實懿自題

芝桂堂額趙蒼壁書仁術通禪理
祇園即杏林

跌翠山樓

清明日跌翠山樓同人訪風遠心學兩上人湘潭陳

鵬年滄洲

紺宇吳山山背開重湖鏡裏見蓮臺六
朝僧向雲中老三笑人從雨後來丈室

優曇香佛骨殘碑松雪護春苔依然空翠尋
欲醉陶潛酒百杯廣陵一曲起湖波石鼎聯吟

繞荔蘿座上茶瓜分供養巖前花雨足婆娑十年
取相君何妄半日浮生我覺多不負清明芳草會
春泥滑滑亦頻過

張愈奇退菴

紆折峰陰古殿閒一林空翠溼香臺流
雲出岫飛還任小鳥呼晴去復來石碣
嚙殘埋鼻屨虬根趨出走莓苔招閒暫憇清涼室
莫戒深杯與淺杯山城高峙枕晴波一片嵐光
淨碧蘿峰外有峰無障礙客中忘客任婆娑冰絃
忽瀉流泉出竹閣遙分夕照多為問探幽何所得
遠公許我日相過

趙瑜瑾叔

雲山別自一天開望裏湖光倚鏡臺僧在
幽篁趺翠坐客從高頂踏青來過頭藜杖
拖烟雨著脚芒鞋沒蘚苔正是使君佳興發况逢
令節喜傳杯倒瀉珍珠泛綠波攜琴直上共披
蘿梵宮鐘磬連鴛鴦漢殿雲霄傍駁娑疊石栽花
閒不少焚香煮茗癖何多青山方外無賓主此日
疎狂興莫過

聖水寺志卷一

釋德音心學

入望湖光萬頃開東鄰近接大觀臺未
隨支遁棲山去何幸元龍帶雨來曲徑
春深餘碧草閒房晝靜長蒼苔清風拂面情無限
幽意惟將茗一杯懷清江水靜無波躡屐佳辰
問碧蘿興逐仙桃花灼灼溼春服雨娑娑鳴琴
試借青霞起積案吟成白雪多他日廟堂回憶此
湖山依舊待君過

前題追和實懿雲巢

寺界湖山道祖開一層樓閣一
層臺蘸波鷗影拖烟起滴翠山
光擁塔來舍利香雲留淨域牟尼花雨護青苔紅
稀絲暗春將老自煮林間陸羽杯平湖如練淨
鷗波築得松寮覆綠蘿嵐氣溼衣山黯淡春光媚
眼樹婆娑雨鳴竹屋跳珠急烟鎖蓬門插柳多遙
和杜陵人不見鶯花歲歲帶愁過

釋明浦靜安

絲玉几前雙鏡開西湖圖裏著樓臺暗
連竹閣雲同住響入山樓雨欲來合節
客應吟白社閉關人不踏青苔風流碩彥今何在
想像花閒啜茗杯心如古井水無波毳衲芒鞋

隱薜蘿題遍烟霞時變化讀殘碑碣日摩娑七條
絃上知音少一盞燈前感慨多憶昔踏青陳跡杳
多情惟有
燕來過

秋夜宿趺翠山樓金叻聞石
星河暫暫破雷車坐繞
龕燈午夜餘熠燿光微

風浙瀝蝦蟇更靜樹扶疎人憐矜裸愁非類水瘴
泮泮歎索居何幸家山仍落手消除藥裹接襟裾

戴廷熺鷓鴣亭
雨過涼影落禪關晏坐煎茶秋思閒一
樹得風吟敗葉百蟲仰露語空山清吟

物外同岑意短鬢燈前歸客顏景
色頗耽良夜好僧牀可惜便忘還

釋實懿
雨洗深山夜倍涼新泉活火試茶鐺詠梅僧
去空畱塔結社人來更下牀四壁寒蛩秋乍

肅一燈茅屋漏初長隔林鐘
動諸峰寺聽到鄰家月過牆

宿趺翠山樓次晚獨歸戴廷熺珠淵
步履禪棲晚苗
茨未掩關秋聲

多在竹人影獨歸山近郭草迷路迎
廬月照顏孤懷愜幽賞得句詠歌還

聖水寺志卷一 十一

趺翠山房密印上人釋通賢字石香號迂叟常州人

獨上黃泥岡崎嶇天路長嵐煙迷杖履竹露滴衣
裳鐘語雲居頂琴鳴聖水堂訪君塵世外相對又

斜陽

讀書雲居外麓山房簡雲巢上人柳溥潔夫
遊踪鴻
爪倦行

膝迨暑幽巖靜氣激書笥到今傳後輩詩名隱自
訪山僧綠沈古竹風前爽翠絳朝嵐座內蒸近賦

歸來結蓮社許吾酬倡得無曾
攜得長安負米
圖來從山頂瞰明湖揚眉綸閣虛簪絨息足琳宮

問苾芻塵網白雲深處隔雨花清嘯望中敷胸情
礪珂終何濟莫笑逃禪兀坐枯
搜到名藍六月

涼菁林盤磴度長廊樵歌曲徑依
清磬蓮渚遙風
送佛香百雉城頭山作帶三台石
畔月如霜我來

急待尋芳躅惹得詩情又欲狂
誰誦因緣開土
林烟霏霧結許追尋殘碑片石清
堪語古履空山

蹟未沈細爇爐香參易畫閒烹茗
塵尾談空意蕊
脈望書成蠹學坐蒲團透佛心

清滄桑歷劫感深情梅花百咏今傳韻松樹千章
舊指名木末當頭親鳥語人烟吹谷識雞聲冲霄
自比支公鶴養翻空階聊一鳴半鄰城堞半林
泉挈伴來登縹緲顛隔院遂聲新雨後殘陽塔影
小窗前湖開圖畫供晨夕月作賓朋晤水天儘許
銜杯蕭寺裏懶來成癖可忘年樓遲暑月已成
秋鳴鳩薜蘿獨喜終朝放巖壑堪追舊日遊更待
怪鳴鳩薜蘿獨喜終朝放巖壑堪追舊日遊更待
九旻恣眺覽南屏紅葉滿山稠迴憶黃沙駕遠
駟竟來紆嶺探江樞吟蛩四壁傳秋氣雲嶂一門
遮翠屏蠨蛸未離羈客況支離堪笑病癯形湖西
釣碣何時遂靜對遙參眼自青莫說蘇公共了
元名區總足養靈根泉流聖水能醫俗嶺逼楓林
可滌煩灼灼野花然石壁啞啞怪雀噪城垣雲駝
已徧南兼北應借雲居作故園臺觀參差倚翠
微爲憐梓里戀春暉無心出岫雲仍在已倦知時
鳥亦歸座客莫猜鸚鵡賦荒居已製芟荷
衣下方鐘鼎隨烟霧坐看雙丸日月飛

贈雲巢上人周寬敬夫
出世超然作大師珊瑚珊幸格
總清奇三生語久千山雨百

聖水寺志卷一

三

尺樓高一卷詩靜裏故應空色相望中真欲
小須彌我來愧未拋塵網稽首阿難問律儀

張朗山招集雲居分體得七古同毛鶴舫先生錢景

舒巖學川暨風遠心學二上人是集洪昉思以病

不赴朱襄嘯園
雲居山有跌翠之山房乃是中峰
禪師古道場梅花百詠久傳誦思

之齒頰猶餘香今有風上人彈琴妙無比聲固不
在絃音亦不在指朗山邀我去訪之因循半載空
爾思况復走使折簡召足踏烈日行步遲冥濛樹
木暗山口上山入門時過西稗畦主人病不赴鶴
舫先生到已久主賓握手無俗情開窗脫衣尊茗
清一枝紅燭照談笑那論撲面來蚤蝨須臾月上
東山頭圓如瑤臺鏡未收輕雲往來光隱見五月
涼生不須扇爾我今宵且勿眠人生歡會亦偶然
禪榻相依暫相語
明朝各自東西去

跌翠山樓避暑楊知誨仲
勝地逃炎暑山房一榻休
蟬聲移樹靜竹影繞廊幽

赤日方臨岫陰雲乍滿樓
詩僧能愛客秋雨為遮留

釋實懿和高處塵襟謝恬吟不自休門臨山路近榻傍竹窗幽雨氣迷江樹秋聲入寺樓晚涼

應可納欵
坐且遲留

水明樓

水明二字 茗溪孫
汝元書

嶷雲額 董其昌書

聯 金湖作孟鉢 包括題
白雲為藩籬

水明樓記仁和處士胡樹虛西林 佛氏以明心為第一義蓋此心不明

則觸處障翳況欲悟徹上乘耶世之人泊淡榮利其夜之所思晝之所趨昏冥沈迷老世而不覺者比比皆是彼欲聚財帛廣田舍為子若孫計長久固宜若此其急也吾不解披緇衣脩白業之徒飄

聖水寺志卷一 三

然一身無世人之累然此心多營同於世人之罔覺或更甚焉豈亦有不得不然者在耶何明于佛氏之義最上為事顧山之寮舍多傾圮無嚴淨之地于是購材木運甌甃度地之宜建樓三楹面西山之陽江光蕩其左湖影凝其右山月相對八窗晝白因額曰水明樓取杜陵四更山吐月湛然如水絕樓之句其意實欲使此心皎然如月湛然如水絕去障翳空明洞徹覺悟上乘若師者庶幾不戾佛氏之旨有見於第一義哉人之登斯樓者能不泥于美之句識師之用心猛然深省不徒玩景於清夜使昏冥沈迷者稍自覺焉當亦師之願哉然則是樓之成師不獨自覺其覺於人者不少矣

初夏登雲居水明樓金志章江聲 古寺雲所居烟翠

廊百雉擁危石來遊及清和逍遙駐輕屐禮塔瞻法雲看竹入叢碧鳴腳搖空陰禽語生晝寂殿隨龍象墮樓因藥王闢勝覽喜自今陳跡感猶昔憑襟共舒嘯高詠遂移夕湖環一角明月吐四更白

銷夏許再來
吟風布瑤席

戴廷熺鵬亭

愛山期山遊十日佳招預維夏景清和好山僧所居雅集同竹溪入座聰殊與

城郭環畫陰林巒漾晴絮畫境目遠收樓成勝全踞盡拓湖面窗茶香石泉瀟米汁配客顏伊蒲且飽飫陰濃綠染衣黃鳥風前語隱隱答吟聲幽脩竹深處合并興偶乘良會時易去阿師句可參少陵詩有據他時待月來水明額新署

雨霽登水明樓訪雲巢上人不值新安汪聖揚石儕

未識水明樓取斯集中見老樹繪陰森遙峰寫蕙舊湖漾白干層城圍青一線禪榻作吟壇茗椀供酣戰恨我來何遲不獲陪歡譙久雨快初晴軒窗開面登眺一憑闌恍若披詩卷藥香砭俗腸爐烟妙清篆餘生欲結緣蓮社吾師羨遠公出未歸賦此以為券

新霽同楊崑臺雲巢水明樓餞柳潔夫北上邵晉之

聖水寺志卷一

西

敘階

我家繡雲樓日夕翠色浮蔚蒼西南瞰視辨晴雨最近一嶺森青楓此間磴道迴轉處知

有調御樓琳宮芒鞋前度豈陳迹瘦藤重策尚過從夜來愁浙瀝曉起喜瞳矐山徑足側泥滑滑山樓角滉波溶溶羣山萬狀衝樓起明滅逼漏雲烟中飛泉練淨眩銀海古塔膚剝擊玉蓉間鷗露影沙際落長堤半見晴何虹總之眾夏釀深綠倚欄自可明方瞳復有楊夫子乘輿撫焦桐梅花疊三弄恰似和中峰千年爪髮餘香在竹林習習生清風新詩賦羣賢伊蒲供已公銜杯發興破寥廓山水能教結習空攜歸貯景繡雲臥底用八挺周九嶼今日良會具歡樂溥也促我折柳何匆匆

外麓山望湖上諸山錢塘范肇新容安

林深斂積雨日薄含疎樵山顛古城堞依依列遙屏竹外漾湖水奩鏡初出矧眾峰翠可拭俯視烟冥冥忽憶去年時蜀道愁淋鈴掉頭返茅茨得與勝侶并吟詩向白社結夏尋禪肩領略靜中趣擺脫世上形在家貧亦樂豈必腰懸釘徘徊日云夕談笑醉復醒明朝酒人約泛艇湖上亭

南屏篆玉讓山

雨止整遊屐清思遂紛紛微風拂林杪疾卷陰壑雲興會固無適登陟從

所欣脩廊瞻遐矚物各呈殷勤重湖界若對山輝鎔氛氳羨彼眾峰影遍繞荷香熏天空愜晴望連袂忘劇分側行淨莎圃示我瘞髮墳各循城坳歸喧寂兩不聞回寺綠沈寺啞啞叫鴉羣

愛松房

益中璇禪師少峰精齋皆其裔也

憩愛松山房贈三峰上人釋明奇

幾度尋真到水潯招提轉抱數峰深

門前竹浪雲連屐石上花濤雨點襟虎卧松龕參慧旨月來笏杖問禪心頭陀指引烟生處只在竺峰最上岑

秋夜宿愛松山房錢塘鄭江筠谷

竹涼月在水讀書閉秋寺露下寒空

高清景娛無寐幽人詠招隱逍遙發遙思徙倚漏方沈衣裳溼嵐翠
又讀書愛松觀暴雨
雲壓長天暗萬峰秋聲遠近吼羣松雷霆廢寺轟妖木風雨空

聖水寺志卷一

五

潭起毒龍兩鏡湖光埋密霧一簾花影度疎鐘輕鷗明滅隨烟艇霽後憑欄翠幾重

孤雲房

在殿東愛松分支無文敬禪師

錢塘魏明府

諱 嶮解組後長寓孤雲與維新西銘

二僧交好後因魏公脩縣誌寺中冒將維新西銘

刊入誌云 國朝某年僧維新西銘重脩雲居實

無其事又寺額雲居二字係趙松雪嫡筆被魏公

易去近日孤雲後裔不振已敗廢矣

按孤雲盛時曾賣木屐故

有雲居木屐之名

上方菴

係雲居下院亦愛松分支春堂茂禪師

上方在一滴泉之下仇兆鼈讀書之所今廢

南溟房

在天王殿東向有半堂羅漢佛壁今廢無念思和尚

聽松樓詩德興夏原吉雜詠

大雅久不作鈞天寂無音繁聲急響徒沸耳涓

風古意誰存心南溟道人獨爾得真趣拂卻哇淫
掃塵慮縛茅直向吳山巔繞屋森森種松樹天風
時自天際來松聲畢發真奇哉清如孤鶴唳碧落
驚如萬馬奔黃埃又如瑤臺三千仙子朝帝闕環
佩珊珊步明月瓊林十八學士登瀛洲軒蓋翩翩
振金節南溟此際誰與俱鉤簾晏坐心于于聲來
松間聽在我我心還似松聲虛不抱焦尾木不弄
柯亭竹惟聽髯龍吟歲寒更奇獨愧予塵俗走未
休耳邊安得辭喧啾南溟南溟
爲我畱半榻尙期後日重來遊

贈南宗上人歸錢塘夏原吉有序

永樂初予奉命在吳時南宗上人攜

看松樓詩謁予索題忙迫中嘗爲綴數句于卷末
迄今二十餘年偶會于燕都晏館語舊未幾又復
告歸踪跡萍逢良用悵懷姑作五十六字以送之
二十年前浙水遊題詩曾上聽松樓四檐窗几

聖水寺志卷一

六

清人骨萬瓦雲烟駐筆畱車轍祇漸同泛梗塵心
徒切仰虛舟如今又向燕山別舊日松風得在否

南溟上人聽松樓黃澤

南溟惠上人深居絕塵想鋤雲種青松隨白鶴長禪心

何悠悠開樓坐閒廠微風天上來木末動清響初
疑琴聲絃上起非角非商亦非徵又疑山陽鐵笛
聲鳴鳴雙蛟夜泣寒潭水清如玄都仙人騎鸞朝
玉京疾如長江風帆日走二千里疾而徐廣庭涼
夜吹笙竽芭蕉卷綠雨聲碎池荷瀉露驚遊魚疎
而數九皋月冷聞孤鶴蕭蕭黃葉階下飛簌簌風
泉澗邊落陰晴風雨聲隨變老衲聽之渾不厭俗
耳昏聾豈解聞塵眸芒昧何由見騏驎四牡皇華
使公餘偶向名山去松下逢人問所之相邀直徠
雲深處琳宮寶刹何崔巍高樓百仞雲中閑徂徠
秀色滿窗戶蚪枝夏夏鳴春雷須臾坐定風轉息
萬籟無聲山寂寂上人索我聽松詩醉墨淋漓掃
樓壁詩成相對已忘言松月涓涓松露滴

白雲亭

在山門東嶺柳潔夫讀書山中同僧
崙山新建嶺上多白雲額李文靜書

對聯

豁開心地渾無我柳溥

收拾山亭好望湖題

暝色西來千嶂雨通淵

練光東起一江湖題

山亭黃萬鈞觀日嶺頭亭子接嶙峋構自雲居外麓人野徑頓呈新色相名山不改舊

精神東西一攬江湖在高下周環樹石鄰廢殿卻愁荒藓合布金長者待良因

同作戴廷喜微樹靄棲簷角斷續江雲落眼前周隱

佛廬清磬出細分樵徑野花妍月生坐久忘歸去讀畫聽詩不礙禪

蘇白竹泉古寺山城絕市囂翼然簷角露巖椒看雲客過耽休息攜杖人來破寂寥石上拂苔

聖水寺志卷一

七

題好句風前搔首聽寒潮新亭景物堪畱戀不負詩瓢與酒瓢

楊式玉元白雉堞成屏疊石遮高亭危立倚烟霞亂雲古寺齋鐘動一徑清波夕照斜江色

倒翻天影碧湖光隔斷市聲譁我來欲共山僧咏尚有深林未落花

常住祭祀法產計田三十八畝二分一釐一毫又續

置田 畝 分 釐通計四十 畝 分 釐坐

落仁和縣五行鎮王家橋二都八圖今入似蘭一

圖髮字號內俱係素菴朴用彰紳兩禪師置每年正月

元旦上殿供菜花菓連中峰殿六桌祝聖之燭大小共四勛燒餅百枚分給上殿眾僧寺長維那雙股撞鐘擂鼓各一股二月朔日送香悉照元旦辦事清明上中峰殿祠堂供菜三桌銀錠六千黃紙三角七月望冬至節悉照上行事二月十九日禮觀音懺一永日香燭供給輪流值事四月八日

沐佛早上喫糖苳禮懺一日悉照二月十九辦向
來冬至日出門收租歸山分給牆頭米按牆之多
寡分給一切完糧納課衙門公費俱在此
產支用總屬不敷眾僧口糧所贖無幾矣

內麓房普同塔一座在畱下欽賢十四圖黎字號內
計五畝

外麓房普同塔一座字號同前計十八畝 分

左侯廟在城北一圖明季西麓所分普同塔在內瘞素

菴朴
禪師

天竺墳一塊在中天竺之上計十弓內麓祭祀

集慶墳一塊在普福嶺計 外麓祭祀

天寧塔一座內瘞維揚天甯寺具如和尚諱明奇係

聖水寺志卷一

六

外麓實懿付法師也計地五分六釐一毫字號同
前

雲居寺荒

土山三十五畝六分八釐九毫二絲
石山七十二畝 每年完糧一兩二錢二
分閏年加
二釐八分

計開常住法器

大銅鐘一口約重二千餘觔

係文曉同徒道清于宏
治十六年十月初十日

募銅磬兩口 重十餘觔 大木魚一個

大鐵雲板一塊

鐵磬一口 瑣碎等物 常住另有
交單不及

細
贅

金文元海昌人也係崙山之族姪長齋繡佛終身不

娶住外麓三十餘年如一日閉戶焚修有金老佛
之名助刊梅花百詠二卷

考田副使西湖遊覽志謂雲居聖水本二寺也明
洪武二十四年始合爲一賜今額此語則是其謂
雲居菴宋元祐間僧了元建聖水寺元元貞間僧
明本建尚有未確查咸淳臨安志載聖水菴本名
靈智院在七寶山巫泉能療民疾嘉定二年改稱
聖水則不始于元也又雲居菴萬厯錢塘縣志載
稱唐懿宗年間建與現在寺志合似雲居並不始
于宋也惟遊覽志成于嘉靖而聶氏錢塘志成于
萬厯彼此互異不知何據
姑俟再考良園汪氏附識